

## PASTOR ET OVES

I Hic vir, quī in campō ambulat, pāstor Iūlii est. Pāstor nōn sōlus est in campō, nam canis niger cum eō est et centum ovēs: ūna ovis nigra et ūndēcentum ovēs albæ. Pāstor ūnam ovem nigram et multās ovēs albās habet. Is 5 est dominus ovis nigrae et ovium albārum. Pāstor ovī nigrae et ovibus albīs aquam et cibum dat. Cum ūna ove nigrā et ūndēcentum ovibus albīs pāstor in campō est.

Cibus ovium est herba, quae in campō est. In rīvō est aqua. Ovēs in campō herbam edunt, et aquam bibunt ē 10 rīvō, quī inter campum et silvam est. Canis herbam nōn ēst, neque pāstor herbam ēst. Cibus pāstōris est pānis, quī inest in saccō. Iūlius pāstōri suō pānem dat. Pāstor canī suō cibum dat: canis ā pāstōre cibum accipit. Itaque canis pāstōrem amat.

ūn-dē-centum = 100 (99)

albus -a -um ↔ niger  
-gra -grum

	sing	plūr
nōm	ovis	ovēs
acc	ovem	ovēs
gen	ovis	ovium
dat	ovi	ovibus
abl	ove	ovibus

rīvus = parvus fluvius



ēst edunt  
vir pānem ēst  
viri pānem edunt


<i>sing</i>	<i>plūr</i>
<i>nōm</i> pāstōr	pāstōrēs
<i>acc</i> pāstōrem	pāstōrēs
<i>gen</i> pāstōris	pāstōrum
<i>dat</i> pāstōrī	pāstōribus
<i>abl</i> pāstōre	pāstōribus

ūnus mōns (< monts)  
duo montēs

vallis ↔ mōns

ūna arbor  
duea arboreis

lupus



suprā prp+acc

nūbēs



ūna nūbēs  
duea nūbēs

sub prp+abl ↔ suprā  
umbra ↔ sōl

umbram petit = ad um-  
bram adit



pāstor in umbrā iacet

ovēs albās relinquit = ab  
ovibus albīs abit

In Italiā sunt multū pāstōrēs. Quī viā Appiā Rōmā 15  
Brundisium it multōs pāstōrēs videt in campīs. Nume-  
rus pāstōrum magnus est. Dominī pāstōribus suīs ci-  
bum dant. Canēs ā pāstōribus cibum accipiunt.

Post campum montēs sunt. Inter montēs sunt vallēs.  
In campō est collis. (Collis est mōns parvus.) In colle 20  
arbor est. In silvā multae arborēs sunt. Ovēs nōn in silvā  
neque in monte, sed in campō sunt. In silvā est lupus.  
Pāstor et ovēs lupum timent, nam lupus ovēs ēst. In silvīs  
et in montibus lupī sunt, in vallibus nūllī sunt lupī.

Sōl in caelō est suprā campum. In caelō nūlla nūbēs 25  
vidētur. Caelum est suprā terram. Montēs et vallēs,  
campī silvaeque sunt in terrā. In caelō sōl et nūbēs sunt,  
sed suprā hunc campum caelum sine nūbibus est. Ita-  
que sōl lūcet in campō.

Pāstor in sōle ambulat. Sub arbore autem umbra est. 30  
Pāstor, quī nūllam nūbem videt in caelō, cum cane et  
ovibus ad arborem adit. Pāstor umbram petit. Etiam  
ovēs umbram petunt: post pāstōrem ad arborem ad-  
eunt. Pāstor ovēs suās ad arborem dūcit.

Ecce pāstor in umbrā arboris iacet cum cane et ovi- 35  
bus. Arbor pāstōrī et canī et ovibus umbram dat; sed  
ovis nigra cum paucīs aliīs in sōle iacet. Pāstor, quī  
fessus est, oculōs claudit et dormit. Canis nōn dormit.

Dum pāstor in herbā dormit, ovis nigra ab ovibus albīs 40  
abit et ad rīvum currit. Ovis nigra ovēs albās relinquit et  
rīvum petit; aquam bībit ē rīvō, et in silvam intrat!

Canis lātrat: "Baubau!" Pāstor oculōs aperit, ovēs aspicit, ovem nigram nōn videt. Pāstor ovēs numerat: "Ūna, duae, trēs, quattuor, quīnque..... ūndēcentum." 45 Numerus ovium est ūndēcentum, nōn centum. Nūllae ovēs albae absunt, sed abest ovis nigra. Pāstor et canis ovēs albās relinquunt et silvam petunt. Pāstor saccum cum pāne in colle relinquit.

Dum cēterae ovēs ā pāstōre numerantur, ovis nigra in 50 magnā silvā, ubi via nūlla est, errat. Ovis, quae iam procul ā pāstōre cēterīsque ovibus abest, neque caelum neque sōlem suprā sē videt. Sub arboribus sōl nōn lūcet. Ovis nigra in umbrā est.

In terrā inter arborēs sunt vestīgia lupī. Ubi est lupus 55 ipse? Nōn procul abest. Ovis vestīgia lupī in terrā videt, neque lupum ipsum videt. Itaque ovis lupum nōn timet. Parva ovis sine timōre inter arborēs errat.

Lupus autem prope ovem est. Pāstor et canis procul ab eā sunt. Lupus, quī cibum nōn habet, per silvam 60 errat. Lupus in silvā cibum quaerit, dum pāstor et canis ovem nigram quaerunt.

Pāstor: "Ubi est ovis nigra? Age! quaere ovem, canis, et reperi eam!" Canis ovem quaerit et vestīgia eius in terrā reperit, neque ovem ipsam reperit. Canis lātrat. 65 Pāstor: "Ecce vestīgia ovis. Ubi est ovis ipsa? Dūc mē ad eam, canis!" Canis dominum suum per silvam dūcit ad ovem, sed ovis procul abest.

Lupus ululat: "Uhū!" Et ovis et canis lupum audiunt.



vestīgium

lupus ipse, acc lupum ipsum

timor -ōris (gen) m  
< timet

ovis ipsa, acc ovem ipsam

dūcit dūcunt  
dūc! dūcite! (imp)



ūnus dēns (< dents)  
duo dentēs

ac-currit < ad-currit

prope ↔ procul

clāmor -ōris (gen) m  
< clāmat



pāstor ovem in umerōs  
im-pōnit (< in-pōnit)

dēclīnātiō -ōnis f (dēcl)  
< dēclīnat

modus -ī m: modō abl

-a -ae

-am -ās

-ae -ārum

-a -īs

-ā -īs

Canis currit. Ovis cōsistit et exspectat dum lupus ve-  
nit. Ovis bālat: "Bābā!"

70

Ecce lupus quī ante ovem est! Iam ovis lupum ipsum  
ante sē videt. Oculī lupī in umbrā lūcent ut gemmae et  
dentēs ut margarītae. Parva ovis oculōs claudit et dentēs  
lupī exspectat. Lupus collum ovis petit dentibus...

Sed ecce canis accurrit! Lupus sē ab ove vertit ad 75  
canem, quī ante lupum cōsistit et dentēs ostendit. Lu-  
pus ululat. Canis lātrat. Ovis bālat.

Pāstor, quī iam prope est, clāmat: "Pete lupum!" Ca-  
nis clāmōrem pāstōris audit, et sine timōre lupum petit.  
Lupus autem ovem relinquit et montēs petit.

80

Pāstor quoque accurrit et ovem suam, quae in terrā<sup>85</sup>  
iacet, aspicit. In collō eius sunt vestīgia dentium lupī!  
Ovis oculōs aperit et ad pāstōrem suum bālat.

Pāstor laetus ovem in umerōs impōnit eamque portat  
ad cēterās ovēs, quae sine pāstōre in campō errant.

85

Procul in monte lupus ululat.

## GRAMMATICA LATINA

Dēclīnātiō vocābulōrum

[I] Dēclīnātiō prīma.

Vocābulum 'īnsula' dēclīnātur hōc modō:

90

	Singulāris	Plūrālis
Nōminātīvus	īnsul a	īnsul ae
Accūsātīvus	īnsul am	īnsul ās
Genētīvus	īnsul ae	īnsul ārum
Datīvus	īnsul ae	īnsul īs
Ablātīvus	īnsul ā	īnsul īs

95

Hoc modō dēclinantur multa vocābula fēminīna. Exempla: fēmina, puella, filia, domina, ancilla, familia, littera, pecūnia, mēnsa, villa, aqua, via, silva, terra, cēt.

## 100 [II] Dēclinātiō secunda.

Sing.	Plūr.	Sing.	Plūr.
-------	-------	-------	-------

<i>Nōm.</i> [A] serv us	serv i	[B] verb um	verb a
<i>Acc.</i>	serv um	serv ōs	verb um
<i>Gen.</i>	serv i	serv ōrum	verb i
<i>Dat.</i>	serv ō	serv īs	verb ō
<i>Abl.</i>	serv ō	serv īs	verb ō

[A] Ut 'servus' dēclinantur vocābula masculīna: filius, dominus, fluvius, numerus, nummus, hortus, nāsus, mūrus, equus, saccus, umerus, amīcus, oculus, campus, rīvus, lūpus, cēt.; puer, vir, liber (nōm. sing. sine -us).

[B] Ut 'verbum' dēclinantur vocābula neutra: oppidum, exemplum, baculum, ōstium, cubiculum, speculum, mālum, ūrnāmentum, collum, pretium, caelum, vestīgium, cēt.

## 110 [III] Dēclinātiō tertia.

Sing.	Plūr.	Sing.	Plūr.
-------	-------	-------	-------

<i>Nōm.</i> [A] pāstor	pāstōr ēs	[B] ov is	ov ēs
<i>Acc.</i>	pāstōr em	pāstōr ēs	ov em
<i>Gen.</i>	pāstōr is	pāstōr um	ov is
<i>Dat.</i>	pāstōr i	pāstōr ibus	ov i
<i>Abl.</i>	pāstōr e	pāstōr ibus	ov e

[A] Ut 'pāstor' dēclinantur haec vocābula: sōl sōlis, timor -ōris, clāmor -ōris (masc.); arbor -oris (fēm.); cēt.

[B] Ut 'ovis' dēclinantur haec vocābula: pānis, collis, vallis, canis (gen. plūr. canum); nūbēs -is (nōm. sing. -ēs); mōns montis, dēns dentis (nōm. sing. -s < -ts); et alia multa. Fēminīna sunt: ovis, vallis, nūbēs; masculīna: pānis, collis, mōns, dēns.

hōc modō : ut 'īnsula'

## PENSVM A

In Italiā sunt multū pāstōr-. Numerus pāstōr- magnus est. Pāstor Iūlii ūnum can- et multās ov- habet. Pāstor est domi-

*Vocabula nova:*

campus  
 pāstor  
 canis  
 ovis  
 cibus  
 herba  
 rīvus  
 pānis  
 mōns  
 vallis  
 collis  
 arbor  
 silva  
 lupus  
 sōl  
 caelum  
 terra  
 nūbēs  
 umbra  
 vestīgium  
 timor  
 dēns  
 clāmor  
 modus  
 niger  
 albus  
 ūndēcentum  
 ēst edunt  
 bibit  
 lūcet  
 petit  
 dūcit  
 iacet  
 relinquit  
 lārat  
 errat  
 quaerit  
 reperit  
 ululat  
 bālat  
 accurrit  
 impōnit  
 ipse  
 procul  
 suprā  
 sub  
 dum  
 ut  
 dēclīnatiō  
 dēclīnat

nus can- et ov-. Can- et ov- pāstōr- amant. Cibus ov- est herba, cibus pāstōr- est pān-. Pāstor pān- ēst.

In coll- ūna arbor est. Pāstor cum can- et ov- ad arbor- it. Iam pāstor in umbrā arbor- iacet. Arbor pāstōr- et can- et ov- umbram dat, sed ov- nigra in sōl- iacet. Nūllae nūb- ante sōl- sunt. In silvā multae arbor- sunt, sub arbor- umbra est. Ov- nigra ā pāstōr- cēterisque ov- discēdit. Canis ov- videt.

## PENSVM B

Pāstor et centum — in — sunt. Pāstor ovibus aquam et — dat. Cibus ovium est —, cibus pāstōris est —. Pāstor pānem —. Ovēs herbam — et aquam — ē —.

Sōl —, nūlla — in caelō — hunc campum vidētur. In colle ūna — est, in — multae arborēs sunt. — arboribus umbra est. Pāstor ovēs suās ad arborem —. — pāstor in — arboris iacet, ovis nigra cēterās ovēs — et silvam —. In terrā sunt — lupī; lupus — nōn procul abest. Lupus in silvā cibum —, dum pāstor et — ovem quaerunt.

## PENSVM C

Num pāstor sōlus in campō est?  
 Quot ovēs habet pāstor?  
 Ā quō canis cibum accipit?  
 Suntne montēs prope pāstōrem?  
 Ubi sunt vallēs?  
 Quid est collis?  
 Quō it pāstor?  
 Cūr pāstor umbram petit?  
 Quō it ovis nigra?  
 Quid ovis in terrā videt?  
 Cūr lupus ovem nigram nōn ēst?